



Inuussutissarsiornermut Aatsitassanullu Ataatsimiititaliaq
ATT.: Siulittaasoq Henrik Fleischer
E-mailikkut ataatsimiititaliap allattaanut Kasper Juul-Nielsenimut nassiunneqartoq

**Ataasiaannartumik atuuttussamik akuersissutitut piffissarititat pillugit
Inatsisartut aalajangiiffigisassaat UKA2019/51 pillugu Inuussutissarsiornermut
Aatsitassanullu Ataatsimiititaliap apequtaanut akissutit.**

11-05-2020
Sags nr. 2019 - 20274
Akt nr. 13707008

Ataatsimiititaliap UKA2019 imm. 51-imik oqaluuserinninnerminut atatillugu ataatsimiititaliap apequtaanut paasinarsisitsisunut matumuuna qjavunga.

Postboks 1160
Tlf: 34 50 00
Fax: 34 55 05
3900 Nuuk

Aalajangiiffigisassatut siunnersuut siullermeerinninnermut akissuteqaammi isummerfigineqanngitsoq aammalu aalajangiiffigisassatut siunnersuut inatsisini atuutereersuni periarfissaareernersoq inersuarmi nalornissutigineqartoq ataatsimiititaliaq allakkamini nasuiaavoq.

Email: pn@nanooq.gl
www.naalakkersuisut.gl

Oqaatsimut ataasiaannartumik atuuttussamik akuersissummut atatillugu siunnersuummi oqariaatsip "matoqqasumik aaqqissuussinerit" atorneqarneratigut nalornisoqalersimasorinarpoq.

Tassunga atatillugu oqariaatsit pingaarutillit ilaat akissuteqaammut ilanngussaq 1-imi ilanngunneqartumi nassuiaatigineqarput.

Ataatsimiititaliap apequtaanut akissutit:

Ataatsimiititaliap apeqqutai sisamat matuma kinguliani "ersarissarneqartumik" allanneqarput aammalu "ersarissarneqanngitsumik" akineqarlutik.

1. a) Naalakkersuisut paasinninnerat malillugu imerniartarfinni, akunnittarfinni, neriniartarfinni assingusunilu ataasinngornermiit sisamangornermut nal. 04.00-ip tungaanut matoqqasumik aaqqissuussinissaq malittarisassat atuuttut malillugit ajornangereerpa?
- b) taamaattoqanngippat, matoqqasumik aaqqissuussinernik taamaattunik ajornarunnaartitsisumik malittarisassanik allanngineq ajoqutissartaqartut Naalakkersuisunit isumaqarfigineqarpa?
- c) Taamaappat? Ajoqutissartat taakku aaqqissuussinernut ammasunut ataasinngornermiit sisamangornermut nal. 04.00-ip tungaanut immikkut akuersissummik qinnuteqarfiusinnaasunut sanilliullugit qanoq allaanerussuteqarpat?

1.a)

Naamik, malittarisassat atuuttut malillugit imerniartarfinni, akunnittarfinni, neriniartarfinni assingusuniluunniit ataasinngornermit sisamangornermut nal. 04.00-ip tungaanut matoqqasumik aaqqissuussinissaq ajornarpoq.

1.b)

Inatsimmut nassuiaatit malillugit imigassamik atuinerup killilersimaarnissaanut aamma imigassamik tulluurtumik siuarsaanissamut naleqquttunik mianerisassanik kommunalbestyrelsip ilanngullugu isiginninniarnissaa imigassamik sassaalliisinnaanermut akuersissuunik tunniussinissami immikkut pingaartinneqarpoq.

Taamatutaaq inatsimmut nassuiaatini allassimavoq "Inatsisip maleruaqqusai siunissaq ungasinnerusoq eqqarsaatigalugu iliuusissani pitsaalluinermi aamma peqqinnerunissamik siuarsaanermi tapertaasussatut isiginneqassapput".

Naatsorsuutigineqarpoq innuttaasunut persuttaasarnerit ikinnerulernerat, innuttut atugarisatigut ajornartorsiutit ikinnerulernerat, timikkut tarnikkullu ajoqusernerit ikinnerulernerat, imminnut toqquttut ikinnerulernerat assigisaallu. Taamaattorli peqqissutsip pitsanngoriarnerata annertussusianut ilaatigut apeqqutaassaaq, imigassamik atuinerup annikilleriarnissaanut naatsorsuutiginisat qanoq annertutigissanersut aalakorniutigalugu imertanermut aamma imerajuttuunermut naleqqiussilluni.

Taamaalilluni malittarisassat piffissami taaneqartumi matoqqasumik aaqqissuussinissamut periarfissisut allannngortinnissaat inatsimmi siunertarineqartunut akerliuserinarpoq.

1.c)

Ataasinngornermit sisamangornermut nal. 04.00-ip tungaanut ataasiaannartumik atuuttussamik akuersissuteqartoqarsinnaanngilaq.

Inatsimmi § 26, imm. 2-mi aalajangersarneqarpoq: "Ataasiaannartumik atuuttussamik akuersissutit pineqartillugit nal. 12.00-imiit 24.00-imut sassaalliisoqarsinnaavoq. Kommunalbestyrelsip tallimannngornerni arfininngornernilu nal. 04.00 tikillugu sassaalliisoqarsinnaanera immikkut akuersissutigisinnaavaa."

Tamatuma saniatigut aaqqissuussinerni matoqqasuni ammasunilu tunngavissarisat assiglinngitsorujussuupput. Taamaattumik matoqqasumik ammasumillu aaqqissuussinerni ajoqutaasinnaasut imminnut assersuunneqarsinnaanngillat.

Aaqqissuussinerit matoqqasut aaqqissuussinerupput privatimik ingerlanneqarnerusartut innuit allanit iserfigineqarsinnaanngitsut. Matoqqasumik aaqqissuussinerni peqataasut (qaaqqusat) tassaagajunnerusarput ilaqutarisat, ikinngutit ilisarimasallu.

Aaqqissuussinerit ammasut aaqqissuussinerupput tunngaviusumik isigalugu kikkunit tamani iserfigineqarsinnaasut, tassa imaappoq innuit siammasinnerusunit erseqqinnerusumillu immikkoortiterneqanngitsunit iserfigineqarsinnaasut.

Taamaaliluni kina aaqqissuussisuunersoq aalajangiisuunngilaq, taamaattorli kikkut aaqqissuussinermut isersinnaatitaanersut aalajangiisuusarpoq.

- 2. Naalakkersuisut isumaat malillugu imerniartarfinni, neriniartarfinni, akunnittarfinni assingusunilu – ilinniarsimasunik sulisoqartuni, atortulersuutillu atorfissaminnut tulluarsagaallutillu akuerisaanissaat naatsorsuutigisariaqarfianni - nal. 04.00-ip tungaanut matoqqasumik aaqqissuussinernut akuersisinnaaneq pitsaaquteqarsinnaava? Tamanna aaqqissuussinerit taamaattut katersortarfinni assingusunilu ammasumik aaqqissuussinertut ingerlanneqartussaanerannut taarsiullugu?**

Matoqqasumik ammasumillu aaqqissuussinerni tunngavissarisat siuliani oqaatigineqartutut assigiingitsorujussuupput. Taamaatumillu matoqqasumik ammasumillu aaqqissuussinerni iluaqutaasinnaasut imminnut assersuunneqarsinnaanngillat.

Assersuut 1:

Naja 50-inik ukioqalerpoq, tamannalu qaaqqusarpassualerluni annertuumik nalliuttorsiutigerusuppa.

Najap 50-inik ukioqalernerimi akunnittarfimmi nalliuttorsiutiginissaa kissaatigippagu imigassat aalakoornartortalit imerneqartut akunnittarfiup imigassanik aalakoornartortalinnik sassaalliisinaanermut akuersissutaani, akunnittarfiup imigassanik aalakoornartortalinnik sassaalliisinaanataaneranut piginnaatitsisumi, ilaassapput.

Najap 50-inik ukioqalernerimi nalliuttorsiutiginissaa angerlarsimaffimmi inissaqannginni ni pissutigalugu katerisimaarnernut inimi attartukkami (imaluunniit katersortarfimmi katerisimaartunut ininik attartortitsisarpata) ingerlakkusukkuniuk imigassaq aalakoornartortalik pillugu inatsimmi tamanna ilaatinneqassanngilaq, soorluttaaq angerlarsimaffimmi nalliuttorsiualaarneq imigassaq aalakoornartortalik pillugu inatsimmi malittarisassani ilaatinneqanngitsaq.

Assersuut 2

Timersortartut klubbiat ukiunik 50-inngortorsiorluni nalliuttorsiorpoq tamannalu nalliuttorsiualaarutigerusullugu. Tassunga atatillugu aaqqissuussinermut isissutissanik tuniniaasqarpoq.

Timersortartut klubbiat ukiunik 50-inngortorsiorluni akunnittarfimmi nalliuttorsiuatigerusukkuniuk imigassat aalakoornartortalit imerneqartut akunnittarfiup imigassanik aalakoornartortalinnik sassaalliisinaanermut akuersissutaanut, akunnittarfiup imigassanik aalakoornartortalinnik sassaallersinaananeranut piginnaatitsisumut, ilaatinneqassapput.

Timersortartut klubbiata ukiunik 50-inngortorsiorluni nalliuttorsiorluni katerisimaarnernut inimi (imaluunniit katersortarfimmi katerisimaartunut ininik attartortitsisarpata) ingerlakkusukkuniuk imigassat aalakoornartortalit imerneqartut imigassaq aalakoornartortalik pillugu inatsimmi ilaatinneqassapput, tassa tamatumani tunngaviumik isigalugu kikkulluunniit isersinnaammata (inuit siammasinnerusut erseqqinnerusumillu immikkooortiterneqanngitsut). Tamanna pissutigalugu ataasiaannartumik atuuttussamik akuersissummik qinnuteqartoqassaaq.

3. Ataatsimiititaliap paasinninnera malillugu aalajangiiffigisassatut siunnersuut akuersissutigineqassappat imerniartarfiit, neriniartarfiit, akunnittarfiit assingullu (ataasinngornermiit sisamanngornermut nal. 04.00-ip tungaanut) matoqqasumik aaqqissuussiffiusut, aaqqissuussinermut taamaattumut atatillugu suli imigassaq pillugu inatsimmi malittarisassanik allanik, imigassanik aalakoornartortalinnik sassaalliinerup nakkutilliiffiusumik ingerlanneqartussaanerata malinneqarneranik qulakkeerinnissamik siunertaqartunik malinnittussaapput, matumani assersuutigalugu §14-imik (akuersissummik arsaarinnittarnermut tunngasumik), kapitali 3-mik (akuersissutaateqartup pisussaaffii pillugit aalajangersakkanik), kapitali 4-mik (imigassanik kimittuunik kimikitsunillu nioqquteqarfiusartunut sassaallerfiusartunullu atugassiissutinut tunngasumik) kiisalu kapitali 6-imik (eqqissiviillioortartarneranut qunusaaralunilu pissusilersortarnermut tunngasumik).

- Naalakkersuisut tamatumunnga qanoq isumaqarpat?

Siunnersuut ima paasivara sapaatini sisamangornernilu nal. 04.00 tikillugu imigassanik aalakoornartortalinnik sassaalliinissamut akuersissummik qinnuteqarnissamut neriniartarfiit, imerniartarfiit il.il. periarfissaqartinneqarnissaat kissaatigineqartoq.

Aammattaaq siunnersuuteqartoq imatut paasivara, akuersissut taamaattoq aaqqissuussinermut matoqqasunut (privatinut), soorlu apersortittoqarneranut, akunnaalliliisoqarneranut, katittoqarneranut il.il. atorneqartussaasoq.

Neriniartarfiit, imerniartarfiit il.il. imigassanik aalakoornartortalinnik sallaalliinissamut akuersissuteqareerput.

Malittarisassat maannakkutut isikkoqartillugit neriniartarfiit, imerniartarfiit il.il. sapaammit sisamangornerup tungaanut nal. 04.00 tikillugu imigassanik aalakoornartortalinnik sassaalliisinnaangillat. Ulluni taakkunani taamaallaat nal. 24.00-ip tungaanut imigassanik aalakoornartortalinnik sassaalliisoqarsinnaatitaavoq. Aamma tamanna atuuppoq aaqqissuussinerit matoqqasut pineqartillugit.

Taamaalliluni inatsimmi § 26, imm. 1, nr. 1-4 innersuussutigineqarput, taakku malillugit neriniartarfiit, imerniartarfiit il.il. tallimangornerni, arfininngornerni aammalu ulloq freerfusussaq sioqqullugu unnuani nal. 04.00-ip tungaanut taamaallaat ammasinnaallutik.

Siunnersuummi saqqummiunneqartumi (nal. 04:00-ip tungaanut ammasinnaatitaaneq) kissaatigineqartoq akuerineqassappat tamatumani inatsisip allanngortinneqarnissaa piasariaqassaaq, taanna malillugu kommunalbestyrelsi piffissat matusarfiit nalinginnaasut qaangerneqarnissaannut immikkut akuersisinnassalluni.

Akuersissummik pigisaqartup pisussaaffii, imigassanik aalakoornartortalinnik tuniniaanermi sassaalliinermilu atugassarititaasut aammalu eqqissivilliornerit naviasaarillunilu pissusilersornerit pillugit malittarisassat allat aallaaviatigut tamatumani sunnerneqassangillat.

- Allani ataatsimiititaliap aalajangiiffigisassatut siunnersuummik, UKA2019/51-imik sularinninneranut attuumassuteqartunik Naalakkersuisut paasissutissiisnaappat?

Siunnersuuteqartup kissaataa akuerineqassappat, akunnaatsuliilluni inuuissiortoqarneranut, katittoqarneranut il.il. atatillugu aamma sapaammit sisamangornermut nal. 04:00-ip tungaanut ammanissamut periarfissaqalerluni, inatsit allanngortinneqassaaq. Tamanna pisinnaavoq aalajangersakkamik ilanngussinikkut, taanna malillugu kommunalbestyrelsi piffissat matusarfiit nalinginnaasut qaangerneqarnissaannut immikkut akuersinnaassalluni.

Kommunalbestyrelsi imigassanik aalakoornartortalinnik sassaalliisinnaanermut akuersisutiniq tunniussisartuummat akuersissutip nutaap kommunini allaffissorneq anner-tusitissavaa.

2019-imi juunimi imigassaq aalakoornartortalik pillugu inatsisip allannguutaa atuutilerpoq, taanna malillugu piffissat sallaalliisarfiit tuniniaaffiillu sivitsorneqarlutik. Naatsorsueqqissaartarfik malillugu ukioq 2019-imi imigassamik akuneqanngitsumik pilersuineq 9 tusind literinik tassa 2,7 procentimik annertuseriarpoq. Naatsorsueqqissaartarfiup tusagassiorfitsigut nalunaarutaa ilanngussaq 2-tut ilanngunneqarpoq.

Siunnersuutip innuttaasut imigassamik aalakoornartortalimmik atuinerisa annertuseriarneranik nassaqarnissaa naatsorsuutigineqartariaqarpoq. Akunnittarfinnik neriniartarfinnil-

Iu ingerlatsiviit kaaviiartitaat amerleriarpata pisortat akitsuutinit isertitaat amerlerias-sapput.

Imigassamik aalakoornartortalimmik atuinerulerneq nappaatinik inooriaatsimit pinngortunik katsorsaanissamut pisortat aningaasartuuteqarnerulernerannik nassataqarsinnaavoq, soorluttaaq ulluinnarni piffissat sassaalliffiit sivitsorneqarpata tamanna inooqataanikkut pitsaanngitsumik sunniuteqarsinnaasoq.

Inussiarnersumik inuulluaqqusillunga
Med venlig hilsen



Martha Abelsen



Ilanngussaq 1

Imigassaq aalakoornartortalik pillugu inatsimmi oqariaatsit paasinarsarnerat:

Aaqqissuussinerit matogqasut/ammasut:

Imigassaq aalakoornartortalik pillugu inatsimmi akuersissuteqariaatsit allaanerusumik inissititerneqarnerat pissutigalugu kommunalbestyrisip sassaalliisarfinnut, soorlu neriniartarfinnut akunnittarfinnulluunniit matogqasumik aaqqissuussinerit ingerlanneqarnissaannut atatillugu ataasiaannartumik atuuttussamik akuersissummik tunniussisarnissaa pillugu aalajangiiffigisassatut siunnersuummi tunngavigineqartoq imigassaq aalakoornartortalik pillugu inatsimmut inissikkuminaappoq.

Inatsimmi akuersissuteqariaatsimi tuniniaanissamut sassaalliinissamulluunniit akuersissutit immikkoortinneqarput. Sassaalliinissamut akuersissummumut atatillugu sassaalliisarfinnut aalajangersimasumik akuersissut pineqarpoq.

Sassaalliisarfiit matogqasumik nalliuttorsiualaartoqartillugu, soorlu nalliuttoqartillugu isertoqarnersut imaluunniit isertut kittunnguullutik eqimattakkuutaarlutik ulloq taanna sassaalliisarfimmiinnissartik toqqaannarsimappassuk taakku inatsimmi immikkoortinneqanngillat. Taamaannerani piffissanut sassaalliisarfinnut il.il. malittarisassat assingi atuupput.

Ataasiaannartumik atuuttussamik akuersissut:

Sassaalliisarfinnut akuersissut aalajangersimasooq aammalu ataasiaannartumik atuuttussamik akuersissut imigassaq aalakoornartortalik pillugu inatsimmi immikkoortinneqarput.

Ataasiaannartumik atuuttussamik akuersissutit imigassaq aalakoornartortalik pillugu inatsimmi ima nassuiaatigineqarput:

"Tassani taaguutsimut "imigassaq pillugu akuersissut" imaluunniit "akuersissut", taava "ataasiaannartumik atuuttussamik akuersissut", assigiinngissutaalluni tassani kisimi pineqarpoq aaqqissuussinermut aalajangersimasumut ataasiinnarmut atatillugu imigassartortitsinissamut akuersissut."

Tamatuma saniatigut ataasiaannartumik atuuttussamik akuersissut imigassaq aalakoornartortalik pillugu inatsimmut nassuiaatini aamma ima nassuiaatigineqarpoq:

"Aalajangersakkami aalajangerneqarpoq ataasiaannartumik atuuttussamik akuersissummik qinnuteqaateqartoqartarnissaa, aaqqissuussinerit ataasiaannartumik pisut ingerlanneqarneranni kikkut tamat peqataasinnaatillugit.

Kikkut tamat iserfigisinnaasaat

Aaqqissuussineq kikkunnit tamanit peqataaffigineqarsinnaasoq tassaavoq tunngaviumik kikkut tamarmik iserfigisinnaasaat. Tassani pingartuunngilaq aaqqissuussinermut kina ingerlatsisuunersoq, kisianni kikkut aaqqissuussinermut isersinnaanersut. Aaqqissuussineq atituumik aamma aalajangersagaanngitsunik sullinniagaqaruni soorlu assersuutigalugu sumiiffimmi aalajangersimasumi najugaqartunik, kiisalu isaarissami isilernerimi ilaasortanngortoqarsinnaalluni, taava aaqqissuussineq taamaattoq kikkut tamat peqataaffigisinnaasaattut isigineqassaaq.

Nipilersorluni tusarnaatitsinerit nipilersorluni tusarnaatitsinissaq sioqqullugu biliitsinik pisititsisoqartillugu, aammattaaq aaqqissuussinertut kikkut tamat peqataaffigisinnaasaattut isigineqartussanut assersuutigineqarsinnaapput, tassani ataasiaannartumik atuuttussamik akuersissut pissarsiarineqassaaq."

Taamaalilluni nassuiaatini isummerfigineqarpoq ataasiaannartumik atuuttussamik akuersissutini ilaatinneqanngimmata privatimik (matogqasumik) aaqqissuussinerit, soorlu inuissiornerit katittoornerilluunniit, taakku tassaanngimmata aaqqissuussinerit tamat iserfigisinnaasaat.



Privatimik katerisimaarnerit

Akerlianik aalajangersakkami ilaatinneqanngillat privatimik katerisimaarnerit, tassa imaappoq katerisimaarnerit privatitut ilusillit.

Taamaalilluni privatimik katerisimaarnerit imigassaq aalakoornartortalik pillugu inatsimmi ilaatinneqanngillat. Inuuissiortoq privatimik inuuissioriarniluni inimik attartorpat imigassaq aalakoornartortalik pillugu inatsit atuutissanngilaq. Pisuni privatimik nalliuttorsiualaarneq sumiiffimmi sassaalliisarfimmi sassaallerfiusumi ingerlanneqartillugu imigassaq aalakoornartortalik pillugu inatsit atuutissaaq. Taamaattoqartillugu sassaalliisarfip akuersissutaa aalajangersimasooq sassaalliinissamut tunngavissiissaaq.

Assersuutit

Pisuni sorlerni akuersissuteqarnissaaq piumasaqaataanersoq aammalu akuersissutip aalajangersimasup nalinginnaasup aammalu ataasiaannartumik atuuttussamik akuersissutip akomanni assigiinngissut ersarissarniarlugit tulliuuttuni assersuutit marlussuit nassuiaatigineqassapput:

Innuttaasup 50-inik ukioqalerluni inuuissiornera imatut ingerlanneqarsinnaavoq:

- Privatimik angerlarsimaffinni, imigassaq aalakoornartortalik pillugu inatsimmik atuuffiunngitsuni. Taamaattumik akuersissuteqarnissaaq piumasaqaataanngilaq.
- Inimi nalliuttorsiorarfimmi/katersortarfimmi, imigassaq aalakoornartortalik pillugu inatsimmik atuuffiunngitsuni. Taamaattumik imigassamik aalakoornartortalimmik sassaalliinissamut akuersissuteqarnissaaq piumasaqaataanngilaq.
- Akunnittarfimmi, neriniartarfimmi imaluunniit allamik sassaallerfiusinnaasumi imigassaq aalakoornartortalik pillugu inatsisip atuuffiini. Sassaalliisarfik imigassamik aalakoornartortalimmik sassaalliinissamut aalajangersimasumik akuersissuteqarpoq. Taamaattumik aaqqissuussinernut tamanut immikkut sassaalliisarfimmi ingerlanneqartunut akuersissummik qinnuteqartoqassanngilaq.

Aaqqissuussineq, soorlu nipilersornermik tusarnaartitsinerit ullorsiornerluunniit, inunnit aalajangersimasumik amerlassusilerneqanngitsunit peqataaffigineqarsinnaasut ima ingerlanneqarsinnaapput:

- Privatimik angerlarsimaffimmi, aaqqissuussinermut atugassanngortinneqartumi
- Inimi nalliuttorsiorarfimmi
- Akunnittarfimmi, neriniartarfimmi allatulluunniit sassaalliisarfimmi.

Pisuni siualiani taaneqartuni pingasuni tamani imigassaq aalakoornartortalik pillugu inatsit atuutissaaq. Taamaattorli pisut pingasut taakku imigassaq aalakoornartortalik pillugu inatsimmi periaatsinik assigiinngitsunik maleruagassiorneqarput:

Aaqqissuussineq privatimik angerlarsimaffimmi, inimi nalliuttorsiorarfimmi assigisaaniluunnii ingerlanneqarpat imigassaq aalakoornartortalik pillugu inatsimmi ataasiaannartumik atuuttussamik akuersissuteqartarneq pillugu malittarisassat atuutissapput.

Oqaatigineqassaarli imigassaq aalakoornartortalik pillugu inatsimmi init qanoq ittuunissaannut piumasaqaateqarmat.

Aaqqissuussineq sassaalliisarfimmi, soorlu neriartarfimmi ingerlanneqarpat sassaalliisarfip akuersissutaa aalajangersimasooq atuutissaaq. Taamaalilluni immikkut akuersissummik qinnuteqartoqassanngilaq.

Taamaalilluni sumiiffinnut assigiinngitsunut pingasunut taaneqartunut ataatsimut atuuttoq tassaavoq taakku tassaammata aaqqissuussinerit privativiusumik taaneqarsinnaanngitsut, tassa inuit erseqqinnerusumik aalajangersimasut pineqassanngimmata.

Sassaalliisarfik:



Tassaavoq imigassaq aalakoornartortalik pillugu inatsimmi nassuiaatigineqartutut sassaalliisarfik. Imigassanik aalakoornartortalinnik sassaalliisoqarsinnaasappat imigassamik aalakoornartortalimmik sassaalliinissamut akuersisummik atuuttumik peqarnissaq pillugu piumasaqaat imigassaq aalakoornartortalik pillugu inatsimmi aalajangersarneqarpoq.

Sassaalliineq:

Imigassaq aalakoornartortalik pillugu inatsimmi sassaalliisarfik ima nassuiaatigineqarpoq: "Imigassanik aalakoornartortalinnik imigassartortitsineq pisarpoq imigassanik aalakoornartortalinnik akiliisitsilluni imigassartortitsineq pisititsiffimmi imaluunniit taassuma eqqaani najoqqarneqartussamik. Viinninik misiliititsineq assigisaallu aammattaaq isummap imarisaanut imigassartortitsinermut ilaatinneqassapput."

2019-imi imigassamik eqqussuineq tunisassiornerlu

*Imigassaq
eqqussorneqartoq
tunisassiarineqartartorlu
2,7 pct.-imik
annertuseriarpoq*

2019-imi imigassaq akoqanngitsoq eqqussuunneqartoq tunisassiarineqartorlu 336 tusind literiusimavoq, titartagaq 1 takuuk. Tamanna ukiup siulianut sanilliullugu 9 tusind literinik imaluunniit 2,7 pct.-imik annertuseriarneruvoq. Innuttaasunut 15-ileereersimasunut agguataaraanni imigassaq akoqanngitsoq inummut ataatsimut 2019-imi agguaqatigiissillugu 7,6 literiusimavoq, ukiup siuliani 7,4 literiusimasoq.


*Sapaatip akunneranut
immiartorfiit qulit
ataatilaarlugit*

2019-imi innuttaasut 15-ileereersimasut agguaqatigiissillugu inummut ataatsimut 7,6 literimik imigassamik akoqanngitsumik atuinerat isumaqarportaaq inuup ataatsip agguaqatigiissillugu sapaatip akunneranut immiartorfiit (genstand) 9,7 imertarsimagai. Immiartorfinni taakkunani immiaaqqat 7,1-iupput, viinni 1,8 kimittoorlu 0,8-lluni.

Naatsorsuinermi aallaaviuvoq immiartorfik imigassamik akoqanngitsumik 1,5 cl-imik imalik.

Titartagaq 1.

Imigassamik akoqanngitsumik eqqussuineq tunisassiornerlu, 1.000 liter



Najoqqutaq: Naatsorsueqqissaartarfik, <http://bank.stat.gl/ALNALK1>

Saqqummiussaq "2019-mi imigassamik eqqussuineq tunisassiornerlu" pdf-fililitut Naatsorsueqqissaartarfiup nittartagaani www.stat.gl-mi aaneqarsinnaavoq. Paasissutissanik sukumiinerusunik pissarserusukkaanni aamma nittartakkami aaneqarsinnaapput.

Paasissutissanik allanik perusukkaanni Naatsorsueqqissaartarfiup pisortaa Anders Blaabjerg saaffigineqarsinnaavoq. E-mail: abla@stat.gl (tlf. 34 57 81).

Inussiarnersumik inuulluaqqusillunga

Anders Blaabjerg

Naatsorsueqqissaartarfiup pisortaa